

## Piita Ɔwolɛ Nyɔsɛ

<sup>1</sup> Me Simon Piita ne n kya ŋmarasɛ fɛye Ɔwolɛ baarɛ. N gyɛ daa Yesu Kirisito gɛsun Ɔwɔrabo, ne n' gyɛ mɔ-Ɔsɔɔ. N kya ŋmarasɛ mi-i sa fɛye abono fɛ ka gyan Yesu Kirisito so ne fɛye-gikagyan mɔ gi wɔra ilaa gbaa' sa fɛye fɛɛ gɛnɔɔbono i wɔra ilaa gbaa' sa aye kee mɔ. Yesu Kirisito gyɛ daa aye-Wurubuaarɛ de aye-Ɔmɔlɛgɛbo. O gyi gɛsintin sa Wurubuaarɛ daa ne fɛ nyɛ ka gyan mɔ so faa. <sup>2</sup> Gɛnɔɔbono fɛ nyɛ bii Wurubuaarɛ mɔ-rɛ aye-Wura Yesu faa mɔ, mɛ' sa fɛye so gɛwɔnsa dɛnsɛ gɛnen de mɛ' sa fɛye gisen yuuli mɛ kya bɔla.

*Wurubuaarɛ* Kya Laarɛ Fɛye-rɛ Mɔ Fɛ' Wɔra Nyamesɛ Kolon

<sup>3</sup> Wurubuaarɛ ɔlon so mɔ, a nyɛ ilaa kamaasɛ ibono i tiri aye de a' nyɛ Wurubuaarɛ asɛ gɛkyena ɔnan de a' taalɛ wɔra mɔ-gisen dɔ ilaa. Ibono a nyɛ bii Wurubuaarɛ mɔ ne n bugi ɔkpa sa aye gɛnen faa. Mɔ Wurubuaarɛ kee ne n tɔgɛ aye yɛɛ a' nyɛ mɔ-nyisigyɛ de mɔ-ginyamesɛ dɛnsɛ gibono ɔ bo mɔ. <sup>4</sup> Mɔ-nyisigyɛ de mɔ-ginyamesɛ dɛnsɛ gidɛ so mɔ, ɔ ka ilaa gbaa'gbaa ibono i kya gyi ginsi mɔ yela sa aye. Kyu naa de gɛnen ilaa ibono ɔ ka yela sa aye mɔ so mɔ, a laa nyɛ wɔra fɛɛ mɔ-gidebi. I lii fɛɛ ilaa ibono ɔ ka yela mɔ i laa yɛgɛ a' nyɛ aye-nyoro lii ilaa nyɛnyɛn giwɔra dɔ. Anyamesɛ ɔbolɛ gɛlaarɛ ilaa ne n kya loori mɔmɔ ilaa nyɛnyɛn giwɔra dɔ.

<sup>5</sup> Imɔso ibono fɛ sɔɔ Yesu gyi faa mɔ, fɛ' pɛɛrɛ ansi wɔra idɛnsɛ bɔla fɛye-gisɔɔgyi mɔ so. Fɛ kya wɔra idɛnsɛ mɔ, fɛ' kasɛ ɔlaako ginyi bɔla fɛye-ilaa dɛnsɛ

giwɔra so. <sup>6</sup> Fɛ kya bii ɔlaako mɔ, fɛ' taale keda fɛye-nyoro. Fɛ taale fɛ dɛ fɛye-nyoro mɔ, fɛ' kyu gisen keda fɛye-nyoro gɛnen kpaa lii. Fɛ kya nyɛ gisen gɛnen mɔ, fɛ' kerɛ de fɛ' sele Wurubuaarɛ ilaa kamaasɛ dɔ. <sup>7</sup> Fɛ kya sele Wurubuaarɛ gɛnen mɔ, fɛ' kyu gɛnyi-abi akyenabi kyu kyena de abara. Fɛ tɛ de abara gɛnen mɔ, fɛ' laarɛ Wurubuaarɛ de nyamesɛ kamaasɛ ilaa. <sup>8</sup> Nengyene fɛ bo gɛnen ilaa dɛnsɛ idɛana fɛye-gɛkyena dɔ ne i kpɛ i kya nyaakyɔ mɔ, gɛnɔɔbono fɛ nyɛ bii aye-Wura Yesu Kirisito faa mɔ, i maŋ wɔra giyan. I laa yɛgɛ fɛ laa wɔra asa abono fɛ bo agyan sa mɔ. <sup>9</sup> Fo ɔbono foŋ bo gɛnen ilaa idɛana fo-gɛkyena dɔ mɔ fo dɛ fɛɛ gyaatanbo abɛɛ foŋ kya sa gɛwɔnsa kpɛ gɛta. Fo tan yɛɛ Wurubuaarɛ gi kpaarɛ fo-gɛkyena dedaa ilaa nyɛnyɛn fue sa fo.

<sup>10</sup> Me-nanboana Yesu asonbo, Wurubuaarɛ gi tɔɔsɛ fɛye lɛɛ ne ɔ tɔgɛ fɛye yɛɛ fɛ' son mɔ faa mɔ, fɛ' kyu aniya wɔra ilaa ibono i laa lɛɛ nyiile yɛɛ ɔ wɔra gɛnen sa fɛye gɛsintin. Fɛ kya wɔra gɛnen mɔ, i maŋ ba yɛɛ fɛ palɛ fɛye-gɛmara sa mɔ, <sup>11</sup> ne gɛkaako mɔ aye-Wura de aye-ɔmɔlɛgɛbo Yesu Kirisito laa sɔɔ fɛye abaa anyɔ de fɛ' nyɛ kpaa kyena mɔ-gɛwuragyi gɛbono gɛŋ bo ɔkara mɔ dɔ.

<sup>12</sup> Lii gɛnen so mɔ, nɛ kyu too me-nyoro so yɛɛ nan kpɛ mi-i nyingi fɛye gɛnen ilaa idɛana pɛwu. I bo no yɛɛ fɛ ti fɛ nyi imɔ. Yesu gɛsintin ɔkalan ɔbono fɛ nu mɔ fɛ ti fɛ yeɛ mɔ so girin. <sup>13</sup> Nɛ wu yɛɛ owi ɔbono n san n tɛ de ansi meŋ ti wu' faa, i kaaborɛ n' kpɛ mi-i nyingi fɛye n kya tɔgɛ mi-i wɔra fɛye de i' nyɛ keda fɛye-nyoro. <sup>14</sup> I lii fɛɛ aye-Wura Yesu Kirisito gi lɛɛ nyiile me yɛɛ maŋ baa kɛɛla gɛsinkpan so. Nan kpɛ wu' lii fɛye dɔ ne. <sup>15</sup> Imɔso n kya pɛɛɛɛ ansi de nengyene nɛ wu' taa fɛye yɛgɛ mɔ, fɛ taale nyingi gɛnen ilaa idɛana owi kamaasɛ.

*Aye Yesu Isɔɔ Mɔ Ilaa Tɔgeɛ I Gyɛ Gɛsintin*

<sup>16</sup> Aye Yesu isɔɔ mɔ a tɔgeɛ fɛye yɛɛ aye-Wura Yesu Kirisito bo ɔlon belɛ, ne ɔ laa kii ba gɛsinkpan so. A tɔgeɛ fɛye gɛnen mɔ, i mɛɲ gyɛ ɔlaako ginyi itarɛ ne a too sa fɛye. A tansi wu mɔ-nyisigyɛ de aye-ansi. <sup>17</sup> Owi ɔbono ɔ bo aye asɛ gɛsinkpan so mɔ, aye-sɛ Wurubuaarɛ gi kyu nyisigyɛ de buubuu sa mɔ. A nu Nyisigyɛ Gɛmu mɔ gbaa-gbaa gi tɔgeɛ lii mɔ so yɛɛ, “Me-gisen dɔ obi ne. Mɔ-ila a kya gyi me-ginsi.” <sup>18</sup> Wurubuaarɛ gi tɔgeɛ gɛnen mɔ, aye-rɛ aye-Wura Yesu pɛwu ne n bo gibii giko so. Nno ne a nu Wurubuaarɛ gbaa-gbaa atɔngɛbi. <sup>19</sup> A nu gɛnen mɔ, i lɔrɔ keda aye-nyoro yɛɛ ilaa ibono Wurubuaarɛ ikalan atɔgebo mɔ mɛ wolaa ɲmarasɛ kyu lii Yesu so yela mɔ i tansi i gyɛ gɛsintin. Imɔso i kaaborɛ fɛ' bugi fɛye-aso de fɛ' nu imɔ. I kya nyiile yɛɛ mɔmɔ-ila ɲmarasɛɛ mɔ i laa yɛge fɛ laa bii ilaa ibono i gyɛ gɛsintin mɔ fɛɛ gɛnɔɔbono fatela kya wu gibiri dɔ mɔ. A' nu gɛnen ilaa ɲmarasɛɛ ibono gɛnen-n kpa a fo gɛkaabono aye-Wura Yesu laa kii ba gɛsinkpan so mɔ. Yesu laa kii ba mɔ, ɔ laa yɛge a tansi bii gɛsintin ilaa fɛɛ gɛdɛ ne n kɛ aye abɛɛ gɛbaadiikɛ gigyɛkpebi ne n lii. <sup>20</sup> Ibono i tansi i tiri yɛɛ fɛ' nu gɛɛ mɔ ne n gyɛ yɛɛ ilaa ibono Wurubuaarɛ ikalan atɔgebo mɔ mɛ ɲmarasɛ wɔra Wurubuaarɛ agyɛbi ɔwolɛ dɔ mɔ, nyamesɛ mɛɲ bo no ɔ laa taalɛ nu imɔ gɛɛ mɔ-gibaa so. <sup>21</sup> I lii fɛɛ iɲ gyɛ mɔmɔ-gibaa so ne mɛ tɔgeɛ Wurubuaarɛ ikalan mɔ ne mɛ ɲmarasɛ yela. Wurubuaarɛ Oduduu mɔ ne n suu de mɔmɔ pɛi ne mɛ taalɛ tɔgeɛ ikalan ibono i lii Wurubuaarɛ asɛ mɔ.

2

*Abonbo Mɛ Laa Saarɛ Fɛye Dɔ*

<sup>1</sup> Adedaabo aberε mɔ i nyε asa ako mε kεε abon yεε Wurubuaare ikalan ne mε kya tɔgε ma-a sa asa. GENEN kee ne fεye-aberε adε dɔ mɔ i laa nyε asa ako mε laa koso kεε abon yεε Wurubuaare gεsintin ilaa ne mε kya nyiile fεye. GENEN abonbo abono mε laa tɔngε adawo so nyiile fεye ilaa nyiilese ibono i kya nyida anyamesε gεkyena mɔ. Yεgε Yesu gi wu' sa ɔmɔ. Mɔ ne n gyε wura ɔbono ɔ sɔɔ mɔmɔ ka gikɔ de mε' nyε kyena sa mɔ. Imɔ-rε imɔ gbaa mɔ, mε laa kine mɔ. Imɔso mɔmɔ gbaa-gbaa mε kya laarε lεwu poroko ma-a sa mɔmɔ-nyoro ne. <sup>2</sup> Abonbo mɔ mε laa wɔra ilaa kpan. Fεye dɔ sakyɔ fε laa buu mɔmɔ-gitan. Asa banban mε wu gENEN mɔ, i laa yεgε mε laa tɔgε ilaa nyENyEN kyu lii Yesu-lεε gεsintin ɔkpa mɔ so. <sup>3</sup> GENEN abonbo adε mε bo onsipara nyENyEN. Mε kya laarε mε' nyε fεye gyi so mɔ, mε laa lεε ilaa nyiilese lii mɔmɔ gbaa-gbaa amu dɔ kyu nyiile fεye. Lii ko-o dedaa mɔ, Wurubuaare gi ti wolaa bun mɔmɔ gipureε. Mɔmɔ-gisobiide gi dε gi gyoo mɔmɔ.

*Asa NyENyEN Mε Laa Sii De Gisobiide Kaabore Mɔmɔ-Nbεle Gεke Mɔ*

<sup>4</sup> A laa taalε bii yεε Wurubuaare laa ka ilaa nyENyEN giwɔra gikɔ gεsintin. I lii fεε Wurubuaare dɔ isɔɔ ibono mε wɔra ilaa nyENyEN mɔ, Wurubuaare mεη yεgε kyεε mɔmɔ. O tii mɔmɔ wɔra ibɔ ibono i bo gibiri gεkpa mɔ dɔ yεε mε' dε nno gyoo gεkaabono ɔ laa gyi mɔmɔ-nbεle mɔ. <sup>5</sup> Dedaa mɔ gENEN kee ne Wurubuaare mεη yεgε kyεε gεsinkpan so asa abono mε mεη selε mɔ mɔ. ɔ yεgε nkyu gi gyi mɔmɔ pεwu. Pεi de nkyu gi' lɔɔ gyi mɔmɔ gENEN mɔ, Nowa berε naa ɔ kya nyiile asa yεε mε' wɔra ilaa ibono i boran sa Wurubuaare. Ne Wurubuaare gi mɔlεgε mɔ-rε asa sono ako, ne nkyu mɔ giη gyi mɔmɔ. <sup>6</sup> GENEN kee ne Wurubuaare mεη yεgε kyεε Sodom de Gomora isowolε so asa. I lii fεε mε mεη selε mɔ. ɔ

tɔgɛ yɛɛ ɔ laa boori ɔmɔ-isowolɛ ka gikɔ. Gɛsintin mɔ, ɔ yɛgɛ ɔgya gi dɛɛ isowolɛ mɔ imɔ-rɛ imɔ-asa bingiri nsɔ, ne i wɔra sinkaala sa asa abono mɛ maŋ seɛ mɔ mɔ. <sup>7</sup> Owi ɔbono Wurubuaarɛ mɛŋ ti taa dɛɛ gɛnen isowolɛ ibono mɔ, ɔnyen ɔko tɛ nno. Mɛ kya terɛ mɔ yɛɛ lɔtɛ. Lɔtɛ gyɛ gɛsintin wura. O wu gɛnɔɔbono isowolɛ mɔ so awura amu a wu' ne mɛ san mɛ kya wɔra ilaa kpan mɔ, mɔ-gisen dɔ i nyida mɔ. <sup>8</sup> Gɛkɛ kamaasɛ mɔ, ɔ kya wu de mɔ-ansi ne ɔ kya nu de mɔ-aso yɛɛ mɛŋ kya ka Wurubuaarɛ nbara mɔ gɛnɔ. Mɔ berɛ kya laarɛ ilaa ibono i boran sa Wurubuaarɛ so mɔ, mɔ-gisen dɔ i kpɛ i kya dɛɛ mɔ daa kyu lii gɛnen ilaa ibonoana so.

<sup>9</sup> Imɔso fɛ' bii yɛɛ Wura Wurubuaarɛ nyi gɛnɔɔbono ɔ laa wɔra de ɔ' lɛɛ anyamesɛ abono mɛ seɛ mɔ mɔ lii ilaa nyɛnyɛn idoo dɔ. O nyi gɛnɔɔbono kee ɔ laa yɛgɛ ilaa nyɛnyɛn awɔrabo mɔ mɛ laa sii de gisobiidɛ kpaa fo gɛkɛ gɛbono ɔ laa gyi anyamesɛ nbɛɛ mɔ. <sup>10</sup> Asa abono Wurubuaarɛ laa tansi biidɛ giso mɔ ne n gyɛ abono mɛ kya son mɔmɔ-ɔbolɛ gɛlaarɛ ilaa ibono i kya kyu ineesi bun mɔmɔ-nyoro ne mɛŋ kya kyu nyamesɛ kamaasɛ ɔbono ɔ kya gyi gɛbelɛnsɛ mɔ terɛ sɛi mɔ.

Gɛnen ne n gyɛ abonbo abono a darɛ yɛɛ mɔmɔ-ilaa nyiilesɛ i kya nyida anyamesɛ gɛkyena mɔ. Mɛ bo ansiɔlon ne mɛ kya nyiile mɔmɔ-nyoro yɛɛ mɔmɔ ne n bo no. Mɛ kya taalɛ saalɛ ilaa ibono i kya nyɛ ɔlon anyamesɛ so mɔ ne iŋ kya taa ŋmaa mɔmɔ-gisen. <sup>11</sup> Wurubuaarɛ dɔ isɔɔ gbaa mɛŋ kya wɔra fɛɛ mɔmɔ-lɛɛ idɛ. Yɛgɛ mɔmɔ-ɔlon de mɔmɔ-oduduu ɔbono mɛ bo mɔ gi don abonbo adɛ-lɛɛ mɔ gbaa bun. Imɔ gɛnen gbaa mɔ, nengyene ilaa ibono i kya nyɛ ɔlon anyamesɛ so mɔ i kya wɔra ilaa nyɛnyɛn ne Wurubuaarɛ dɔ isɔɔ mɔ mɛ laa kpaa buu imɔ sa Wura Wurubuaarɛ mɔ, mɛŋ kya kpaa saalɛ mɔmɔ sa Wurubuaarɛ. <sup>12</sup> Gɛnen abonbo adɛ

mε δε daa fεε nfεdɔbuε; mεη kya sa nwɔnsa pεi de mε' lɔɔ wɔra ilaa. Ilaa ibono mε mεη nyi imɔ dɔ mɔ, asebi ne mɔmɔ berε mε kya kyu loo imɔ dɔ. Mε laa nyε imɔ so lεwu fεε gεnɔɔbono i δε sa nbuε nko yεε gyanbuε ɔ' pεεδε nmo mɔɔ mɔ. <sup>13</sup> Ilaa nyεnyεn ibono mε wɔra mɔ mε laa nyε imɔ so gikɔka. Mɔmɔ-ilaa laarεsε ne n gyε nta ginun de ɔkon gigyi. Mε san mε kya laarε mε' wɔra daa imɔ toloowi kalaadε. Mε kya wɔra fεye ipeeli ne mε kya nyida ilaa sa fεye fεε gεnɔɔbono ilaa kpense i kya yii gεgbε mɔ. Mε kya wɔra abaa gyi de fεye mɔ, i kya wɔra mɔmɔ ɔkon yεε mε kya nyε fεye mε kya penε. <sup>14</sup> Asa mɔmɔ-kaana gilaarε ne n kpε i gyan mɔmɔ-ansi so, ne ilaa nyεnyεn giwɔra iη kya fii mɔmɔ gεkaako kpa-a. Mε kya penε asa abono mεη ti nyε yeλε Yesu gεsintin ɔkalan mɔ so girin mɔ yεε mε' kase daa mɔmɔ abonbo ilaa wɔrase mɔ. Onsipara nyεnyεn gi den mɔmɔ. Mɔmɔ berε, Wurubuaarε gi tɔgε nno wɔra mɔmɔ. <sup>15-16</sup> Mε taa gεsintin ɔkpa mɔ yεgε, ne mε naa kpe mε kya wɔra ilaa nyεnyεn fεε ibono Baalam, Beeyɔ mɔ-bi mɔ gi wɔra mɔ. Nkana Baalam baarε kya tɔgε Wurubuaarε ikalan, ne ɔ baa fuε Wurubuaarε ɔkpa. Mɔ-gεlaarε ne n gyε yεε ɔ' wɔra ilaa nyεnyεn de asa mε' ka mɔ imɔ so gikɔ. Gεkε gεdε ɔ koso de ɔ' kpaa wɔra gεnen ilaa nyεnyεn ibono, ne Wurubuaarε gi gya mɔ. ɔ yεgε bee, gbaa, gi bugi gεnɔ tɔngε sa mɔ fεε nyamesε de ɔ' nyε taa ilaa kpan ibono nkana ɔ kya laarε ɔ' kpaa wɔra mɔ yεgε.

<sup>17</sup> Abonbo adε mε kya lεε asa tanga fεε nkolobii nbono gi kya ηaa gibele mɔ, abεε nyangbon ne n sin ɔ kya laarε ɔ' baa da ne ɔ kya koso mɔ. Wurubuaarε gi kyu nfono i tansi i bo gibiri gεkpaa mɔ yela sa ɔmɔ yεε nno ne mε laa kpe mɔmɔ-lεwu gεmara. <sup>18</sup> Agyεbi boduduuse abonbo a kya lii mɔmɔ-nno dɔ mɔ a don mɔmɔ ne aη kya kpaa nyamesε de sεi. Fεε asa ako mε kya laarε mε'

taa abon ɔson mɔ yɛgɛ mɔ, gɛnen abonbo adɛ mɛ kya kyu ilaayan nwɔnsa kii baa penɛ mɔmɔ. Gɛnen nwɔnsa nbono gi kya lii daa aye anyamesɛ-lɛɛ ɔbole gɛlaarɛ ilaa asɛ. <sup>19</sup> Abonbo mɔ mɛ kya tɔgɛ wɔra asa mɔ yɛɛ, “Nengyene fɛ nu aye asɛ mɔ, i laa wɔra fɛɛ fɛ tɛ fɛyegibaa so ne. Fɛ mɛɲ tɛ sa ɔko.” Abonbo abono mɛ kya tɔgɛ ilaa idɛ pɛwu faa, mɔmɔ mɔ ne n gyɛ nbide sa ilaa nyɛnyɛn giwɔra ibono i kya nyida nyamesɛ mɔ. I lii fɛɛ ilaa nyɛnyɛn giwɔra i gyi mɔmɔ-amu. Fo ɔbono ilaa iko i gyi fo-gimu ne fonj baa taalɛ taa imɔ giwɔra yɛgɛ mɔ, fo bingiri gɛbide sa gɛnen ilaa ibono ne. <sup>20</sup> Nkana abonbo adɛ mɛ ti nyɛ mɔmɔ-nyoro lii Wurubuaarɛ ilaa kyosɛ ibono asa mɛ naa ma-a wɔra gɛsinkpan gɛdɛ so mɔ dɔ. Mɛ ti bii aye-Wura de aye-ɔmɔlɛgɛbo Yesu Kirisito. Imɔ gɛmara mɔ, mɛ kii kpaa loo gɛnen ilaa nyɛnyɛn ibono dɔ, ne i kya kii nyɛ ɔlon mɔmɔ so. I ba gɛnen mɔ, i kya lɔrɔ wɔra nyɛnyɛn sa mɔmɔ don gigyangbarasɛ mɔ. <sup>21</sup> Ne fɛɛ mɛ mɛɲ ti bii gɛnɔɔbono nyamesɛ kya nyɛ mɔ-gisen dɔ i' wɔra ɔdan sa Wurubuaarɛ kerɛ daa mɔ, nkana i bɔ. Idɛ faa mɔ, Yesu isɔɔ mɔ mɛ ti yɛgɛ mɛ nu nbara nbono Wurubuaarɛ gbaa-gbaa gi yela sa anyamesɛ mɔ. Ibono mɛ taa nmɔ yɛgɛ faa mɔ, i laa tansi wɔra mɔmɔ nyɛnyɛn. <sup>22</sup> Mɔmɔ-ilaa wɔrasɛ i kyena de akpalɛ adɛ.

“Gyoono gi kpalegɛ yela naa kyon,  
ne o kii baa puru mɔ-akpalegɛtɔ mɔ gyi.”

Ne

“Kuuri, mɔ, fo ne n kine fo gyere mɔ lɔrɔ nɛɛ,  
gipatɛɛ dɔ ne ɔ laa kii kpaa dɛ fɔgedɛ.”

### 3

#### *Wura Yesu Laa Kii Ba Gɛsinkpan So*

<sup>1</sup> Me-nanboana laarɛsɛ, ɔwɔlɛ baarɛ ne n gyɛ me-ɔwɔlɛ nyɔsɛ ɔbono n kya ŋmarasɛ mi-i bunge fɛye. Imɔ

inyo do mo, n kya nyingi feye daa ilaa ibono fe ti wolaa nu mo. N kya toge mi-i wora feye de feye-gewonsa ge' nye gyan gesintin ilaa ide so. <sup>2</sup> N kya laare fe' nyingi ilaa ibonoana Wurubuaare ikalan atogebo mo me wolaa toge yela mo. Wurubuaare ne n loro omo yela sa mo-gesun. Fe' nyingi aye-omolegebo de aye-Wura Yesu nbara nbono o yela ne mo-isoo mo me lee toge sa feye mo.

<sup>3</sup> Ilaa ibono i gyangbara mo, fe' bii yee owi obono gese gere i kya laare i' yela okara mo, i laa baa nye asa ako me laa koso me kya hmase feye. Genen asa abono me laa kpe me kya nu daa de momo wole-lee obole gelaare.

<sup>4</sup> Genobono so me laa kyu hmase feye mo ne n gyee yee me laa taase feye yee, "Feye-Wura Yesu gi ka yela sa feye yee o laa kii ba gesinkpan so mo, o bo fone do daa? Owi obono o ka sa feye genen mo, aye-sana me san me yii ayaa. Lii ko-o ibono Wurubuaare gi lee soso de gese baa lii de nde faa, genobono ilaa kamaase i kpe i de mo, genen ne i kpe san i de faa." <sup>5</sup> Me kya hmase feye genen mo, me kya kere ansi daa yee me men nyi yee dedaa mo Wurubuaare genoo do gigyebi ne o kyu lee soso de gese. Me men nyi kee yee Wurubuaare gi lee gesinkpan mo, o lee gemoo lii daa nkyu do, ne kyu lii nkyu so kee ne gesinkpan ge bo no faa. <sup>6</sup> Owi oko do mo, kyu naa de Wurubuaare genoo do gigyebi kee so mo, o yee nkyu gi gyi gesinkpan ne i nyida gemoo pewu. <sup>7</sup> Kyu naa de Wurubuaare genoo do gigyebi mo kee so ne Wurubuaare gi kyu soso de gese yela gyoo yee ogya ne o laa san kyu baa nyida imoo mo. Genen geakaabono ne o laa gyi anyamese nbele de o' bun asa abono men sele mo mo gipuee de o' mooo momoo gekpaa.

<sup>8</sup> Me-nanboana laarese, ibono fe te fe gyoo Yesu gikiiba faa mo, fen sa fe' tan yee Wura Wurubuaare ase mo, geke kolon ge de fee nsi nwe gudu, ne nsi nwe



gudu mɔ gi dɛ fɛɛ gɛkɛ kolon. <sup>9</sup> Ako mɛ kya tɔgɛ yɛɛ Wurubuaarɛ dɛ mɔ-ilaa ɔ kya kpɪi gɛsɛ, nkana ɔfaanan ɔ ti yɛgɛ Yesu Kirisito gi kii ba gɛsinkpan so fɛɛ gɛnɔɔbono ɔ ka yela mɔ. In gye yɛɛ Wurubuaarɛ dɛ mɔ-ilaa ɔ kya kpɪi gɛsɛ. ɔ bo gisen sa anyamesɛ daa. ɔŋ kya laarɛ fɛɛ ɔko ɔ' fuɛ mɔ-lɛwu gɛmara. ɔ kya laarɛ yɛɛ nyamesɛ kamaasɛ ɔ' nyɛ nu mɔ-nyoro gɛsɛ yɛɛ ɔ gye ilaa nyɛnyɛn ɔwɔrabo de ɔ' taa imɔ giwɔra yɛgɛ.

<sup>10</sup> Gɛkaabono Wura Yesu laa kii ba gɛsinkpan so mɔ, gɛnen gɛkɛ mɔ gɛ laa fuɛ asa ayaa fɛɛ oyu. Gɛkaabono mɔ, Wurubuaarɛ laa yɛgɛ ɔgya laa yɛlegɛ ilaa ibono o kyu pɔɔɔ soso de gɛsɛ mɔ nyida de ilaa kamaasɛ ibono i bo gɛsinkpan so mɔ de gɛsinkpan mɔ gbaa-gbaa gɛ' dɛɛ ŋonii. Soso de gɛsɛ i laa yela ɔkara gɛnen gɛkaabono. Aberɛ abono soso i kya yela ɔkara gɛnen mɔ, i laa wɔra ɔlanba.

*Imɔso Fɛ' Kyena Gisen Fufuli Awura Akyenabi*

<sup>11</sup> Ibono ɔgya laa baa nyida ilaa kamaasɛ fafaanan faa mɔ, menɛtɔ anyamesɛ gidebi ne i kaaborɛ fɛ' wɔra? I kaaborɛ fɛye-gɛkyena dɔ ilaa pɛwu dɔ mɔ, fɛ' lɔɔɔ fɛye-nyoro yela sa Wurubuaarɛ de fɛ' seɛ mɔ. <sup>12</sup> Fɛ' kyu fɛye-gɛwɔnsa gyan' gɛkɛ gɛbono Wurubuaarɛ laa yɛgɛ Wura Yesu o' kii ba gɛsinkpan so mɔ so de fɛ' wɔra ilaa ibono i laa yɛgɛ ne gɛnen gɛkɛ mɔ gɛ laa ba kusaa mɔ. Gɛnen gɛkɛ gɛbono mɔ, soso i laa dɛɛ nyida. ɔgya mɔ awulewule a laa yɛgɛ ilaa ibono Wurubuaarɛ gi kyu pɔɔɔ soso de gɛsɛ mɔ kee i' yɛlegɛ. <sup>13</sup> Imɔ gɛnen gbaa mɔ, Wurubuaarɛ gi ka yela yɛɛ ɔ laa kii lɛɛ soso de gɛsɛ pɔɔɔɔ, ne aye-ansi a gyan' imɔ so gɛnen. Gɛsintin so-o ne mɛ laa gyi nno.

<sup>14</sup> Imɔso me-nanboana laarɛsɛ, fɛye-ansi a gyan' soso de gɛsɛ pɔɔɔɔ mɔ so faa mɔ, fɛ' tɛsɛ nyanga ansi de

o' wu yεε fε tε de abara de gisen yuuli. Fε' yεgε fεye-  
 asen a fuuli de ɔη sa o' wu ilaa nyεnyεn iko fεye-nyoro  
 so tɔgε. <sup>15</sup> Yesu mεη ti kii ba gεsinkpan so faa mɔ, fε' bii  
 yεε aye-Wura Wurubuaare kya nyε gisen sa asa daa de  
 mε' nyε de ɔ' mɔlεgε mɔmɔ de mɔmɔ-rε mɔ nsana i'  
 nyε lɔrɔ pεi de Yesu ɔ' lɔɔ ba. Aye-nanbo laareεε Pɔɔlo  
 kee gi ti wolaa ηmarase imɔ sa fεye. Wurubuaare ne n  
 sa mɔ ɔlaako ginyi ne ɔ ηmarase genen. <sup>16</sup> Pɔɔlo ɔwolε  
 kamaase ɔbono ɔ laa ηmarase ne ɔ laa tɔgε kyu lii Yesu  
 gimaakiiba belen mɔ so mɔ, genen ne ɔ kya ηmarase ne.  
 Mɔ-iwolε dɔ mɔ i bo ilaa ikoana ibono i kya wɔra ɔsen  
 de fε' nu imɔ gεεε kusaa. Asa abono mεη kase ilaa ne  
 mεη yeε ilaa kolon so mɔ mε kya keda Pɔɔlo iwolε nten  
 nko kyεεgε. Genen ne mε kya keda Wurubuaare agyebi  
 sεnsε kee kyεεgε ne. Mε kya wɔra imɔ idε genen pεwu  
 faa mɔ, mε kya laare mε' fuε mɔmɔ-lεwu gεmara ne.

#### Agyebi Tiikarase

<sup>17</sup> Me-nanboana laareεε, fεye berε, fε ti wolaa fε nyi  
 imɔ idε. Imɔso fε' kerε fεye-nyoro so dɔɔdan de fε mεη  
 sa fε' yεgε asa abono mεη kya gyi Wurubuaare nbara so  
 mɔ mε' nyε fεye penε de i' yεgε fε' tɔrɔ Wurubuaare  
 ɔson mɔ dɔ. <sup>18</sup> Fεye berε, fε' kpε fε kerε aye-Wura de  
 aye-ɔmɔlεgεbo Yesu Kirisito ansi dɔ yεε ɔ laa kpaa fεye.  
 Fε ti nyε bii mɔ fεye-asen dɔ faa mɔ, fε' kpε fε kya bii  
 mɔ genen fε kya too.

Nyisigyɪ ɔ' wɔra mɔ-lεε aberε adε dɔ kpaa lii aberε  
 abono aη bo ɔkara mɔ. [I' ba genen.]

ḠḠḠḠ ḠḠḠḠḠḠ, ḠḠḠḠḠ ḠḠḠḠḠḠḠ ḠḠ ḠḠḠḠ ḠḠḠḠḠ  
AnyamesḠ ḠḠ ḠḠḠḠ ḠḠ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 30 Nov  
2021

4cc402b4-139a-5f33-9af9-fbf62307f663